



**Gemeinsam Äntwert vun der Madamm Gesondheitsministesch an vum Här Minister fir  
Entwécklungszesummenaarbecht an humanitär Ugeleeënheeten op d'parlamentaresch Fro n°  
6035 vum 7. Abrëll 2022 vum honorabelen Deputéierten Här Sven Clement.**

1. Wat fir konkret Aktiounen hunn de Gesondheits- a Kooperatiounsministère säit dem Oflafe vun den  
13'000 Astra-Zeneca Dosen am Dezember 2021 ënnerholl, fir Impfdosissen, déi sech hirem Oflafdatum  
zougin, un aner Länner weider ze ginn?

Wéi Gavi, d'Organisatioun déi zoustänneg ass fir d'international Verdeelung vun Impfdosissen iwwert de  
COVAX Mechanismus, ënnersträicht, kënn et bei all Impfkampagne zou Zerstéierungen vun Impfdosissen;  
déi weltwäit Impfkampagne géint den Covid-19 Virus ass do keng Ausnam.

D'Ministèren hunn, wéi och virdrun, eng Rei Démarchen ënnerholl, fir Impfdosissen un aner Länner  
weiderzeginn an ze évitieren, dass Dosissen mussen zerstéiert ginn. Dëst geschitt souwuel um  
multilateralen wéi och um bilaterale Plang.

D'Majoritéit vun den Impfdosissen déi Lëtzebuerg deelt, ginn iwwert de COVAX Mechanismus vu Gavi mat  
anere Länner gedeelt. Dee multilateralen Wee gétt privilegiert, wéll den COVAX Mechanismus et  
erméiglecht, d'Donatiounen doriwwer juristesch an logistesch ze encadréieren.

Op EU Niveau, a vun der EU, gétt probéiert, des Donatiounen esou gutt wéi méiglech iwwert den COVAX  
Mechanismus ze facilitéieren. Et kann heiansdo virkommen, dat Impfdosissen vu Gavi iwwert den COVAX  
Mechanismus un Entwécklungslänner allouéiert ginn, mee dat déi Länner d'Donatiounen am Endeffekt  
net akzeptéieren. An deene Fäll probéiert Gavi d'Dosissen un aner Entwécklungslänner ze proposéieren,  
bis dass et duerch den Ooflafdatum aus Sécherheetsgrënn net méi méiglech ass, des Impfdosissen ze  
benotzen. An deem Fall mussen se zerstéiert ginn.

Dat hat um Ufank mat de limitéierten Absorptiounskapazitéiten vun de betraffene Länner ze dinn, an och  
domat, dass den Intérêt fir d'Impfungen an de Rhythmus vun den Impfkampagnen relativ niddereg war.  
Mee a leschter Zäit huet et ëmmer méi domat ze dinn, dass d'Disponibilitéit vun den Impfstoffer weltwäit  
staark eropgaang ass, an doduerch d'Demande fir Donatiounen erofgaang ass.

E klengen Deel vun den Impfdosissen huet Lëtzebuerg iwwert de bilaterale Wee gedeelt. Bei dësen direkte  
bilateralen Donatiounen ass et esou, dass et sech ëm Impfdosissen handelt, déi scho geliwwert goufen an  
an de Länner, also zum Beispill zu Lëtzebuerg, stockéiert sinn. Déi Donatiounen si méi komplizéiert ze  
organiséieren. Hei vir mussen als éischt interesséiert Länner fonnt ginn. Da mussen, och aus  
Responsabilitéitsgrënn, mat den Producteuren zousätzlech Kontrakter ënnerschriwwen ginn, fir den  
Transport an d'Donatioun juristesch ze encadréieren. Schlussendlech muss dann den Transport  
organiséiert ginn, deen bei klengen Quantitéiten net käschtingenschtég ass an je no Impfung méi  
komplizéiert ass.

Och hei ass, wéinst der wäit verbesserter weltwäiter Verfügbarkeet, d'Demande no bilateralen  
Donatiounen staark erofgaang. Doduerch ass et méi schwéier Länner ze fannen, déi un der direkter  
bilateraler Donatioun vun Impfdosissen interesséiert sinn. Falls sech keng interesséiert Länner fannen, da  
kann et sinn, dass duerch déi uewen erwähnten Secherheetsgrënn, Impfdosissen net méi kënnen gedeelt  
ginn.



All d'Partnerlänner vun der Cooperatioun si vun onsen Ambassaden am Laf vun de leschte Méint kontaktéiert ginn fir Démarchen fir eventuell bilateral Donatiounen vun Impfdosissen ze initiéieren. Iwwert déi Donatiounen eraus, déi Lëtzebuerg schonn organiséiert huet, hunn ons Partnerlänner dëser Offer keng Suite ginn. Och LuxDev, d'lëtzebuenger Entwécklungsagence déi an onse Partnerlänner präsent ass, krut rezent keng Demande an där Hisiicht.

Nieft den Donatiounen vun Impfdosissen, huet Lëtzebuerg och Donatiounen gemaach vu Frigoen fir Impfstoffer ze stockéieren. Dëst ass gemaach ginn fir de Länner et sou ze erlaben, fir iwwert eng Stärkung vun der „chaîne du froid“, hier Impfkampagnen besser ze organiséieren an esou d'Absorptioun vun Impfdosissen ze erhéichen an doduerch och d'Zerstéierung vun Impfdosissen sou vill wéi méiglech ze évitéieren.

2. Gouf et konkret Diskussiounen mat engem vun eise 7 Partnerlänner zu dësem Thema?  
Wa jo, mat wem a wéini?

Et gëtt hei op d'Äntwert op déi éischt Fro verweisen.

3. Déi 4'700 Dosen Astra-Zeneca wäerte warscheinlech net méi kënne virun der Zerstéierung gerett ginn.  
Déi nächst Dose Johnson&Johnson lafen den éischte Juni 2022 of. Wéi eng konkret Pläng huet de Ministère  
bis elo opgestallt, fir dës Dose weider kënne ze ginn, vue dass dovun auszegoen ass, dass dës net méi all  
opgebraucht wäerte ginn?

Déi 4.700 Dosen Astra-Zeneca wäerten effektiv zerstéiert ginn.

Déi Dose vun Johnson&Johnson déi den 1. Juni 2022 oflafen wäerten och zerstéiert musse ginn wéll keen Interesse ugemellt ginn ass vun engem Land fir dës z'iwwerhuelen.

Lëtzebuerg, den 10. Mee 2022

D'Gesondheitsministesch

(s.) Paulette Lenert